

鄭
堂
讀
書
記

鄭堂讀書記卷三十三

烏程周中孚撰

史部十九

目錄類二

金石上

宋至明

金石錄三十卷

雅雨堂叢書本

宋趙明誠撰

明誠字德父諸城人歷官知湖州軍州事

四庫全書著

錄書錄解題通考宋志俱載之宋志又小學類別

出之德父以歐陽公集古錄尙有漏落又無歲月

先後之次因廣而成書上自三代下訖五季鐘鼎

麻鬲盤匱尊敦之款識豐碑大碣顯人晦士之事

蹟凡見於金石刻者略無遺矣因次其先後裝成
二十卷編爲目錄十卷詳其撰書人名氏及時代
年月又撰爲跋尾二十卷凡五百二篇蓋德父有
所考證乃爲題識皆別白牴牾是正譌謬凡史傳
之失及歐公集古諸跋之誤亦因是以訂定焉然
世縣千載卷帙浩繁千慮之中不無一失盧抱經
爲之參考隸釋隸續字原金石略金石文字記隸
辨等書疏其得失加案語於下庶使瑕瑜各不相
掩前有德父原序并盧雅雨見曾重刊序及凡例
末有政和丁酉河間劉跂後序紹興壬子德父之
妻李易安清照後序開禧乙丑浚儀趙不謏師原

跋明成化癸巳吳郡葉仲盛志并何焯記三則

隸釋二十七卷

錢塘汪氏橫松書屋刊本

宋洪适撰

适字景伯郡陽人皓之長子也紹興十二年中博學宏詞科官至尚書左僕射

同中書門下平章事諡文惠

四庫全書著錄書錄解題通考

宋志俱載之是編專載漢隸碑碣而作上自建武迄於黃初青龍而以西晉所刊張平子碑殿之自劉熹賈逵以下悉棄不錄計薈粹一百八十九種各以正書錄其全文而題識於後并附注其釋文徵引辨證視歐陽集古錄趙氏金石錄兩書尤爲精核其水經注暨歐趙之有無俱注於目錄之下凡十九卷又摘錄鄮趙二歐諸錄之涉於漢隸者

鄭記三十三

爲水經注碑目一卷俱輯其崖略集古錄二卷歐陽棐集古錄目一卷金石錄三卷俱載其跋尾及自序無名氏天下碑錄一卷則載其碑目及碑之所在自有碑刻以來推是書爲最精博矣特是書易隸爲楷轉寫足易譌舛又漢人作隸往往假借通用或加或省或變或行奇大譎怪中雜篆籀不知者妄加改竄愈失洪氏之舊錢唐汪日秀從傳是樓刊本悉心擬校始付梓較之明季鏤版大相逕庭矣前載景伯原序目錄後有日秀跋及吾進繕校跋

汪本隸釋刊誤一卷

士禮居刊本

國朝黃丕烈撰按洪景伯隸釋今行於世者僅錢
唐汪氏新刻本而已蕘圃得崑山葉氏所藏舊鈔
宋槧本以刊汪本之誤得千有餘條詳加考釋彙
爲是編凡葉本與婁彥發漢隸字源合者雖同此
一字不過偏旁點畫稍涉歧異必爲標舉蓋婁氏
書所載實與舊本相合也蕘圃意在復舊本面目
故有他說而不涉舊本者則弗及也其於東漢文
字不彌有功耶前有嘉慶丁巳自序及段茂堂師
序錢竹汀題詞末有自撰後序及顧廣圻跋

隸續二十一卷

錢唐汪氏樓松書屋刊本

宋洪适撰 四庫全書著錄書錄解題通考宋志

俱載之景伯會粹漢刻既著隸釋二十七卷繼此
以往復有隸續二十一卷隸續十卷隸韻七卷隸
圖三卷隸續以下世罕流傳毛氏隸續本尙少二
卷而闕謫孔多隸續僅見吾氏學古編隸韻僅見
趙氏讀書附志隸圖則全書盡收入是編第五卷
第六卷第八卷中蓋後人因是編有關佚而取隸
圖以攬入之當又在毛本之後矣是編體例悉仍
隸釋之舊凡漢魏晉之碑碣石經儀禮左傳之遺
文磨崖石闕神道之題字石壁石室之畫宅舍墟
墓之甌刀鏡鼎壺鉦鐙槃洗枯梓板函鐵盆壽梓
官塋之銘識石羊石虎之刻莫不罔聚而會粹之

所收諸刻較隸釋稍瑣細而考證精核則無異也
故編次雖不能復洪氏之舊間有殘闕不全者而
不能不與隸釋並行也前有乾道丁亥其弟邁序
後有淳熙己亥喻良能跋又有乾隆戊戌汪日彥
跋謂得金風亭長鈔本以校近刻多所增益其謬
脫處仍不能不相沿襲云

稽史一卷

寫本

宋翟耆年撰

耆年字伯壽別號黃鶴山人參政汝文之子

四庫全書

著錄書錄解題子部雜藝類宋志俱作二卷其下
卷久佚不傳惟上卷存前爲徽宗三則次自比干
墓銅槃記迄於晏氏鼎彝譜凡十七則下卷凡十

六則所謂有錄無書也所載皆篆隸之體各爲論說原委了然足以輔辟氏鐘鼎款識所未及而諸體之中猶爲最古故舉以名書以括其餘云

鐘鼎款識一卷

揚州阮氏積古齋摹刻本

宋王厚之撰

厚之字順伯號復齋諸暨人乾道三年進士歷官淮西通判改江東提刑

直顯謨閣是冊款識凡五十九種內畢良史牋識十五

器皆秦燬之物此外朱敦儒一器牋識數行以詞意推之亦似燬筆又如周師旦鼎楚公鐘號姜鼎爲一德格天閣中之物其餘數十種乃劉炎張詔洪遂諸人所藏皆非秦氏物也厚齋就所拓本摹裝成冊且釋其文疏其藏弄之所後轉入趙松雪

家松雪兼書辭用敏攷證於曾侯鐘後後相繼爲
項子京曹倦圃朱竹垞所藏兼嘉慶壬戌阮雲臺
師得此冊於吳江凌氏加以攷釋摹刻成書并係
以跋跋前自竹垞跋外又有查慎行沈元滄胡開
泰汪森查嗣琛錢泳金農龔翔麟錢大昕翁方綱

十跋

輿地碑記目四卷

寫本

宋王象之撰

象之金華人慶元二年進士知江寧縣知縣

四庫全書

著錄按書錄解題通考宋志補俱載有

象之輿地

紀勝二百卷其書久佚此卽其中碑目四卷當時
有別本單行故流傳於世也其書皆以府州軍分

載而各注其所在及年月姓氏於下大致與陳思
寶刻叢編體例相類但陳氏用北宋輿圖此用南
宋輿圖陳氏集諸家題跋此多自爲攷證耳而其
攷證精確者足以證羣書之譌誤至嘉興府末綴
武原志雲間志二種安吉州末綴吳興雜錄以下
十三種平江府末綴松陵集以下七種以及鎮江
嚴州台州衢州建康太平寧國徽州信州池州饒
州之末皆不然此第據首卷而言其次卷以下亦
無不盡然蓋象之本以碑記分爲二者而著之目
故各以府州軍之圖經地志綴之非濫收也究之
碑居十之九記僅十之一則仍以碑刻爲主云

蜀碑記十卷 函海本

宋王象之撰 國朝李調元編王氏著有輿地紀勝二百卷久已散佚所存者祇輿地碑記目四卷著錄於四庫全書所載東南十六路於蜀刻尤加詳細皆注釋其年月姓氏大略於下雨邨因於碑目中摘出在蜀者編爲十卷刻入函海焉又另錄輿地碑記目原本次序於前不入卷數所列諸目俱依國朝郡縣名次其考證精確者如成都府殿柱記作於漢興平初年則辨其非鍾會書嘉定府移水記有嘉州二字則辨其非郭璞書皆確有證據不同臆測然其所摭取掛漏尙多此兩邨

所以有蜀碑記目補之編也

蜀碑記目補十卷

函海本

國朝李調元撰

調元仕履見五經總義類

兩邨既從王氏輿地

碑目中摘出在蜀者編爲蜀碑記十卷嫌其所摭取尙不無掛漏因以已所得者別爲是編以補之於每卷中分王本所未有而增入者曰補王本所已有而釐訂者曰考俱遵國朝郡縣名標出以便縷閱所繫跋語皆根據羣籍以闡發之殊較王氏爲詳所謂後來者居上也據其自序知其每卷先以王所得列於前爲上卷而以已所得列於後爲下卷其合爲十卷示不敢紊不敢襲也今是本

既依卷數各爲一編函海總目亦分兩處故亦各爲之記云

絳帖平六卷

寫本

武英殿聚珍版本

宋姜夔撰

夔字堯章
鄱陽人

四庫全書著錄堯章以淳

化舊帖難得乃取絳州公庫本爲之本事釋文名曰絳帖平本漢廷尉平之義也據其總錄人名及書跡辨僞二篇俱以日月光天德山河壯帝居太平何以報願上登封書爲別其書當有二十卷今是本僅六卷所載字號止於山字蓋舊止鈔本其河字以下已佚不可復得然就此六卷觀之考據俱極精博不同尋行數墨其前總又有總錄敘時

鄭記三十三

七

九品書人二篇及嘉泰癸亥自序末有乾隆癸巳

計籌山瑣跋

寶刻叢編二十卷

南瀛吳氏藏舊寫本

宋陳思撰

思臨安人理宗時官成忠郎輯熙殿國史實錄院祕書省搜訪

四庫

全書著錄書錄解題通考俱載之是編以元豐九

域志京府州縣爲綱而各以古碑目繫之其地昔

人辨證審定之語俱著於下各著其所出書名其

編次雖以地分而分地之中仍以時世爲次自周

秦以迄五代凡十九卷末一卷爲諸書所錄刻石

地理未詳者而於唐五代碑碣蒐采最富可以補

歐陽永叔趙德父之遺漏矣歐陽集古有卷帙次

第而無時世先後趙氏金石錄迺自三代秦漢而

下敘次之而不著所在郡邑及鄭復仲作系時系

地二錄亦疏略不備

見書錄解題

其他如諸道石刻錄

訪碑錄之類於所在詳矣而考訂或缺焉是編以

地爲經以時爲緯徵引賅備足資考證與宋人實

刻類編以書家姓名分類者俱創從前未有之例

要皆攷金石文字者所宜津逮也惜乎是書祇有

鈔本而無刻本如卷四宋東京路第九京兆府下

卷十一秦鳳路河東路卷十二淮南東路西路卷

十六荆湖南路北路卷十七成都路並已闕佚卷

十五江南東路饒州以下至江南西路亦佚其半

卷十八梓州利川路惟有渠巴文三州而錯入京
東西路京西北路淮南路諸碑其餘亦多錯簡雖
爲吳稷堂省蘭所藏尙未能依四庫全書著錄

本一一爲之釐正也前有紹定己丑魏鶴山了翁

紹定辛卯陳直齋振孫紹定壬辰孔山居士三序

每冊俱有吳氏名號二小印

蘭亭考十二卷

知不足齋叢書本

宋桑世昌撰

世昌字澤卿淮海人世居天台陸游之甥也

四庫全書

著錄書錄解題載澤卿蘭亭博議十五卷其書久
佚又載蘭亭考十二卷云卽前書浙東庾司所刻
視初本頗有刪改初十五篇今存十三篇去其集

字篇後人集蘭亭字作書帖詩銘之類又附見篇
及右軍他書蹟於樂毅論尤詳其書始成本名博
議高內翰

文虎

炳如爲之序其子似孫主爲刪改

去此二篇固當其他務從省文多失事實或戾本
意其最甚者序文本亦條達可觀亦竄改無完篇
首末闕漏文理斷續於其父猶然深可怪也通考
所載亦同惟於蘭亭作十三卷蓋博議十五卷卷
爲一篇似孫刪去二篇適得十三卷陳氏作十二
篇未知合併何卷今本亦作十二卷卷一蘭亭卷
二睿賞卷三紀原卷四永字八法卷五臨摹卷六
卷七審定上下卷八推評卷九法習卷十詠贊卷

十一傳刻卷十二釋禊陳氏祇此書累十餘卷不
過爲晉人一遺帖自作無益玩物喪志本無足取
云其中所錄諸家跋語有脫然僞妄而不能辨者
未暇疏舉云云實是書之定評也卷末附羣公帖
跋數則不及入卷數前有嘉定戊辰高文虎嘉定
甲申高似孫二序後有嘉定甲申齊碩跋及乾隆
壬寅鮑廷博重刊跋

蘭亭續考二卷

知不足齋叢書本

宋俞松撰

松字壽翁自署曰吳山
蓋錢塘人官承議郎

四庫全書著

錄是編蓋續桑澤卿蘭亭考而作故曰續考然祇
甄錄兩宋人蘭亭諸跋以成書與澤卿書體例迥

異不知何以云繼也諸家跋語惟李微之心傳所

作皆能舉正史事足有資於攷證蓋微之本熟精兩宋事實也故其序是書亦云壽翁於此寶藏折衷以示後人亦志據依游之一助未可以玩物而疵之也後有淳熙甲辰自跋及明人二跋

石刻鋪敘二卷知不足齋叢書本

宋曾宏父撰

宏父字幼卿自稱鳳墅逸客廬陵人按宏父之名偶與曾惇之字同朱竹

垕厲樊榭均以爲卽曾惇者誤也

四庫全書著錄是編皆序述

宋一字法帖源流凡十六則冠以紹興石經孟蜀石經薛氏鐘鼎款識三則殷以蘭亭二則歐陽氏集古錄一則其敘蜀石經本末特詳又南渡後祕

閣帖亦銓訂有序至以閣絳諸郡帖譜具前而鋪敘於後與同時曹端可譜系雜說作法相似大抵皆鑒別不苟者也末附朱竹垞何義門錢竹汀三跋并附錄鮑漾飲跋及漾飲校定誤字三十一條譜系雜說二卷

百川學海本

宋曹士冕撰

士冕字端可號陶齋都昌人嘉熙淳祐間由幕僚而仕州郡

四

庫全書著錄作法帖譜系蓋據知不足齋藏本當不誤也宋志及宋志補俱不載其書專敘淳化法帖源流冠以法帖譜系圖上卷爲淳化法帖以下二十二種下卷爲絳本舊帖以下十四種各系以跋以評論其摹刻始末異同正拙優劣無影不遺

就準化一帖而展轉摹刻耳端可顧切切於此痼疾不可療矣

寶刻類編八卷

舊寫本

不著撰人名氏前後亦無序跋其編次始周秦訖唐五代其爲宋人所撰無疑又宋寶慶初避理宗嫌名改江南西路之筠州爲瑞州此編載碑刻所在有云瑞州者又知其爲宋末人也宋志及宋志補俱不載惟以文淵閣書目載之而永樂大典並全載其書今館臣卽據以錄出著錄於四庫全書是編取書家姓名分類編次其分類凡八曰帝王曰太子諸王曰國主曰名臣曰釋氏曰道士曰

婦人曰姓名殘缺每類之中復以時代爲次而於
序五代碑刻蒐錄尤富亦可以補歐趙之遺惟名
臣十三之三一卷全闕計闕天寶並大厯諸碑此
則永樂大典原闕更無從據他本以補之矣攷陳
思寶刻叢編以郡縣爲綱與是書體不同然陳氏
書兼采諸家辨證之語俱著於下此則僅著撰人
書體年月碑之所在雖同爲金石家所宜津逮究
不及陳氏書遠甚況名臣類孔子在其中曹操亦
在其中其紕繆如是宜其不流傳於當世也

古刻叢鈔一卷

知不足齋叢書本

明陶宗儀編

宗儀字九成黃巖人元末舉進士不
中卽棄去累辭辟舉洪武中乃出爲

教官

四庫全書著錄是編甄錄碑誌銘詩檄題名之類漢三魏一晉二宋三齊一梁三隋二唐四十八宋三無年月者三其六十九種隨見隨鈔不以年代爲銓次其刻見於他書者不過三數種餘俱藉是編以傳足以補正史之闕所載唐人詩七首亦自來錄唐詩者所未及也故雖鈔撮之書卷帙寥寥而實有資於攷證矣前載四庫提要後載錢塘周嘉猷跋至顧氏刊入讀畫齋叢書又增元和顧澗養三跋平津館叢書所收乃孫淵如師重編本也

名蹟錄六卷附錄一卷

寫本

明朱珪編

珪字伯盛崑山人舊題元人誤也

四庫全書著錄倪

氏錢氏補元志所載俱無附錄一卷伯盛精極篆隸眞草法之妙尤善摹刻凡朝廷制誥詞命與夫公卿大夫遺民逸士道宮僧寺碑志墓碣之類及山水題名尺牘往復亦所不遺歲月滋久積以成帙凡一百三十二篇皆其生平所鐫不闕入他刻也伯盛嗜古好修志不徇俗學士大夫靡不與之納交所載之文悉皆絕妙好詞非但可以供臨池之好而所以補史氏之缺略者亦有取焉然據其目錄注闕者凡四篇今有錄無書者又五十八篇蓋傳寫多佚脫無從據別本以補之矣末爲附錄

一卷皆一時贈言亦伯盛所輯錄也有洪武丙辰
秦仲父約文序後有成化丙午朱性父存理寫本
跋蓋是時尙無刊本也又有朱竹垞跋當屬傳鈔
者從集中寫入云

金薤琳琅二十卷

杭州宋氏刊本

明都穆撰

穆字元敬吳縣人弘治進士官太僕少卿

四庫全書著錄

明史藝文志亦載之是編一以洪氏隸釋爲法取
自周迄唐碑刻六十二種備錄其文而各繫以跋
尾石本文不具者補以版本而已所及見者爲斷
絕不逞私智以妄爲附益其用心頗爲矜慎所微
不足者其點畫不能悉依本文而每易以近體且

間有不審致誤者故諸家徵引其書而亦不恕其
誤杭州汪荻洲取所藏石刻字字比較一還其本
眞且明著其說此其有功於都氏者也末附補遺
一卷則乾隆辛酉宋藥川

振譽

校刻是書時并出家

藏舊揭四種繫以崖略補錄於後前後各爲序跋

瘞鶴銘考一卷

顧氏四十家小說本

明顧元慶撰

元慶字大有號大石山人長洲人都穆之門人也

四庫全

書存目是編取華陽眞逸瘞鶴銘并序錄其全文於

前而下雜見古金石諸書凡二十則以相證雖不

及張力臣所辨汪文升

士鏡

所考爲詳然正德以

前諸說采輯已略備矣近王述庵師列入金石萃

編從此顧張汪三家之書雖不觀可也

法帖神品目一卷

函海本

明楊慎編是編所載凡古篆見於模刻者十四種
秦漢各十一種三國及晉各五種南北朝三種雜
碑四十二種帝王十一種右軍十六種淳化諸帖
三十六種共一百六十四種每種注其何人所書
及碑之所在不知者闕之其以神品標目者蓋專
就書法論也前有李雨邨序

法帖釋文考異十卷

露香園刊本

明顧從義撰

從義字汝和上海人嘉靖中以善書薦官大理寺評事

四庫

全書著錄汝和以蘭亭有考絳帖有評獨淳化闕

帖寥寥於是釋其訛誤考其異同勒成是編手自繕寫以授梓人於前人之說亦頗采輯以發明之其討論辨析可謂博矣而不免疏於考證有待後人之論定焉前有王伯穀稱登序

嶽麓書院禹碑集一卷

明刊本

不著編輯者名氏湖南長沙府之岫巘山有神禹治水碑宋嘉定壬申郡守何子一致取隨竹市買麻碎而摹之得古篆七十七字刻於嶽麓書院所謂麻塌岫巘本也是編首錄明熊元性字禹碑序一篇宋張光叔世南游宦紀聞一則及夏禹王圖然後以碑文譯字列之並以明人序跋辨釋及詩

十三首終焉據卷末之詩爲嘉靖壬子作當卽其
時刊本云

金石林時地考

無卷數寫本

明趙均撰

均字靈均自號墨工生吳縣人宦光之子也

四庫全書著

錄靈均取諸家金石諸書及續出古刻仿陳氏寶
刻叢編之例分編次仍依時代分注郡縣於下故
曰時地考凡一冊前有萬厯己未自序又有部目
一冊分字義篆籀符印分隸小楷正書署書章草
行草狂草集王書法十二部又分唐人雜帖宋四
家雜帖元人雜帖各種明朝四家何莊澤化帖記
語同碑異刻圖畫外國文字集帖澤化帖停雲館

帖書目十二部則彌叢雜無緒矣前亦有自題後
有家藏法帖貞珉自跋

石墨鐫華八卷

萬厯戊午刊本

明趙涵撰

涵字子函鹽屋人萬厯乙酉舉人

四庫全書著錄作

六卷附錄二卷子函自髫年卽耽金石又居近周
秦漢唐故都搜求較易其在遠方則乞諸朋友之
宦遊者爲之羅致積之旣夥爰仿歐趙都楊四家
之例綴以跋尾彙爲六卷自夏禹衡岳碑以迄元
之道德經碑共二百五十三首內止周武王銅盤
銘唐景雲觀鐘銘二種屬金其餘俱屬石刻故取
文心雕龍詠碑篇語以名之也其於金統經略郎

君行記元重陽萬壽宮碑俱屬國書世不多見既
全摹其文並釋書漢文亦具錄左方作異觀尤爲
周匝惜其得如許古碑而所爲諸跋專事品題書
法未能有證史傳則不及後來諸家之用心焉末
二卷爲附錄皆其仿古遊記三篇及詩三十二首
雖於本書爲贅疣然觀之亦可見其求索之勞矣
前有目錄詳載碑之所在並及撰書人氏實與各
跋相次而備又有自序及陳伊菴組綬康無沴萬
民二序近鮑渌飲廷博取以刊入知不足齋叢書
又增錢唐何養浩琪及子函之元孫衡陽並渌飲

三跋

金石史二卷

知不足齋叢書本

明郭宗昌撰

宗昌字允伯華州人

四庫全書著錄與趙子

函同時皆以搜求金石爲事而是書所錄自周迄唐止五十三種各綴以跋遠不及石墨鏤華之繁富然能崇真斥僞其識見亦有過人者惜所跋六十則惟事講論書法不甚有裨於攷證雖標目曰史恐去宣和書譜無幾耳前有 國朝劉

澤溥王

宏撰

二序

鄭堂讀書記卷三十三

鄭堂讀書記卷三十四

烏程周中孚

史部二十

目錄類三

金石下 國朝

御刻三希堂石渠寶笈法帖釋文十六卷

乾隆十五年梁詩正等奉

敕編

詩正字養仲號
蕪林錢塘人

正八年進士累官大學士
加太子太傅卒諡文莊

先是

詔以

內府法

書真蹟

命 詩正

等詳慎審定編爲石渠寶笈一

書復

命 詩正

等擇其尤者重加編次鉤摹上石

爲三希堂法帖凡三十二冊上自魏晉下迄元明

正行草書眾美賅備凡遇宸翰評跋一皆敬摹
於後垂則古今至歷代名人題識之可采及收藏
璽印之可據者亦具存焉第石刻貯在禁廷自
宣賜外罕得瞻仰館臣乃恭錄釋文編爲是帙
刊版印行由是得以家置一編矣

欽定校正漳化閣帖釋文十卷

武英殿聚珍版本

乾隆三十四年奉敕撰是編於祕府所儲閣
帖擇漳化四年賜畢士安之本爲初搨第一者
命內廷諸臣校定刻石併釐正其標題之訛刊改
其音釋之誤侍郎金簡因恭錄其中案語釋文以
聚珍版印行仍從原帖目次編爲十卷冠以御

題寓名蘊古四字及御製淳化軒記 命諸臣
校正摹勒 諭旨并諸臣職名末載原帖舊跋及
諸臣書後

閒者軒帖考一卷 知不足齋叢書本

國朝孫承澤撰 承澤仕履見書類 四庫全書存目退谷

著庚子銷夏記中有石刻四卷其鑒裁頗精審而
是編成於順治丁亥遠在庚子銷夏記之前所記
自禊帖至停雲館帖凡三十八種每種先標其名
而各評隲於其下與銷夏記所載詳略不同品評
亦異故當以後來爲定論也

古今金石表一卷 寫本

國朝曹溶撰

溶仕履見傳記類

四庫全書存目是編皆

記其所得碑帖之目先列上古秦漢魏晉六朝次及唐五代次及宋遼金元又次以唐人碑陰凡八百餘本各繫以撰書姓氏及年號地名雖名爲表仍屬尋常碑目而非旁行斜上之式且於各代之內皆不以時爲次隨意雜列不過記簿之類不足以言金石錄也前有自序不著年月玩其詞氣大約入國朝以後作云

別本求古錄一卷

寫本

國朝顧炎武撰

炎武字寧人號亭林崑山人

四庫全書著錄

乃兩淮鹽政采進本其書上自漢曹全碑下至明

建文霍山碑凡五十六種每刻必載全文是本種
數適合而編次無序所有考釋亦甚寥寥未能如
兩淮本之詳明也或不學者隨意鈔錄不顧時代
并不求完善苟且了事謬稱全帙耳版心具有然全帙二字
是本雖非原本其序尙是原序今取金石文字記
核之前後俱屬相同惟中一段太異知是書當屬
金石文字記之初藁至成書後易以今名并改竄
舊序爲新序故書中考釋亦多與金石文字記大
同小異後來潘稼堂刻遺書亦不收入也亭林文集亦無
求古錄顧其中碑刻有不見於記者如加青帝懿
自序號詔御祝文蘇軾題名敕賜昭裕公碑晉祠宋人

題名呂惠卿詩記霍山中鎮廟宋阮綱詩元趙穀
詩宋頤莊子牒永壽王詩神宗賜文彥博詩文潞
公記金王庭筠詩司馬公祠堂詩碣司馬溫公墓
誌計十五種雖爲當時所棄而後人得之亦足有
資於攷證則此書宜其與金石文字記並行於後
代矣惜是本未能重加訂正以復 四庫著錄本
之舊耳

金石文字記六卷

亭林遺書本

國朝顧炎武撰 四庫全書著錄亭林好訪求古
人金石之文以其事多與史書相證明可以闡幽
表微補闕正誤不但詞翰之工而已以故所至名

山巨鎮祠廟伽藍之跡無不尋求其可讀者必手
自鈔錄并抉剔史傳發揮經典多有歐趙兩家之
所未具者自商周以迄五季凡三百餘種俱詳加
博考不爲意必之談其無可攷者具其立石年月
及撰書人名氏而已其卷末爲識餘則並攷及宋
元諸刻及明霍山廟建文一碑又有諸碑別體字
一篇附載於後其自序曾經所至之地豈無掛漏
又望後人之同好者繼我而錄之也是以其門人
吳江潘稼堂未復於茲編之外并歐趙所未錄者
爲之補遺二十四種借月山房彙鈔亦收入之

石經攷一卷

亭林遺書本

國朝顧炎武撰 四庫全書著錄案亭林金石文字記於漢唐石經攷證最詳而不及歷代因復專勒是編凡分十有二目曰總序曰漢石經曰魏石經曰晉石經曰石經歷代存毀之迹曰雜著論跋曰唐明皇御書孝經曰唐石經曰蜀石經曰宋開封石經曰宋高宗御書石經曰晁公武石刻古文尙書皆彙輯羣書具詳其沿革異同大略極爲精核間有疏舛亦千百之一耳後來諸家遞加攷證益臻美備而亭林實有勛始之功焉借月山房彙鈔亦收入之

國朝葉封撰

封字井叔號慕廬黃州人順治己亥進士官至工部主事

四庫

全書著錄慕廬官登封知縣時取其境內石刻自漢至明無大小古今完闕悉爲蒐擷考其世次列其臧否錄其書法之善者或不甚善而其人名世其詩文卓爾者俱爲著錄間有人無足數而不斥置者以其文與書之工也自漢及唐苟不至於剝蝕殆盡則盡爲登載不能全收者節錄數語及姓名歲月計其五十五種編爲上下二卷凡石尙存而不可搨或未收者及志載其題文當時有碑碣而今無者悉錄其目曰紀遺附後備考以登封地在嵩山之南故以嵩陽爲名其辨訂亦頗博洽故

能原委了然可謂觀古之一助云前有自序凡例

及秀水俞

汝言

序後有跋

金石錄補二十二卷

寫本

國朝葉奕包撰

奕包字九來崑山人

其書前有自序稱余少

喜臨池得墨碑百本審其拓偃之勢而知師承所約妄欲搜訪隱僻以補趙氏之遺王子宛仲出其所藏二十種子舊蓄二十餘種皆漢唐舊碣爲趙氏所未錄者仿其例作辨正跋語以誌一時之見嗣是有得卽續書之後附凡例稱漢碑自隸釋後遺者絕少予所錄不止補趙且以補洪三國六朝亦無幾姑俟博訪今觀其書凡古器物跋尾一卷

自夏商迄五代碑跋十七卷續跋一卷集異一卷
傳疑一卷雜記一卷自第一卷以下但分卷而不
著卷數且多有三四頁爲一卷者蓋尙未成之書
也然其跋尾至三百二十餘通較之趙氏書之五
百二通已踰其十之六洵足以補洪趙兩家之闕
而集異傳疑雜記三卷尤有資於攷證以視葉石
君萬續金石錄誠遠出其上矣前又有婁江錢

序及魏叔子

禧題辭

石經考一卷

常熟蔣氏省吾堂刊本

國朝萬斯同撰

斯同字季野鄞縣人

四庫全書著錄考石

經之書始於顧亭林而朱竹垞經義考列門繼作

然非專以石經爲事至季野復取顧氏書而推廣之自諸家之外并及亭林所著金石文字記求古錄二書其有未備則作案語以發明之於漢魏唐蜀兩宋徧爲詳考而尤詳於唐及北宋蓋以補亭林之略也後杭堇浦作石經考異疑其未見是書而大旨亦頗相類總之杭萬兩家闕一不可也

瘞鶴銘考一卷

舊寫本

國朝汪士鋐撰

士鋐字文升號退谷長洲人康熙丁丑進士官至右春坊右中允

四庫全書存目康熙壬辰湘潭陳滄洲

鵬年閒

居京口冬月獨遊焦山值江水大涸所謂瘞鶴銘傾墮在山之足者沙石俱露乃募工曳而出之按

其辭義補綴湊合千年神物復還舊觀於是文升
備采前人之論合爲是帙卷冠以新出之圖及張
力臣昭原圖并原石定位數行張氏圖內補石原
文四則刪繁補缺特見精核雖則一石之書故當
與顧氏元慶張氏力臣分鼎足矣前有自序後有
文升小傳載郡邑志

分隸偶存二卷

原刊本

國朝萬經撰

經字授一號九沙鄆縣人康熙癸未進士官翰林院編修

四庫

全書著錄九沙素嗜書學尤篤於分隸因取古來
論隸學及作隸人姓氏彙爲是編附以已說及漢
唐碑刻題識語數十則上卷凡六篇曰作書法曰

鄭記三十四

分隸書法曰論分隸曰論隸分楷所由起曰論漢
唐分隸同異曰漢魏碑考下卷爲古今人分隸姓
氏自秦程邈以迄明末馬如玉凡三百十有二人
各繫以小傳皆掇拾羣書著其所出惟馬如玉爲
所自撰凡分隸之源流碑版之存佚用筆之工拙
諸家之短長無不臚列而存之蓋取書斷書譜隸
釋諸書合而爲一名雖偶存實集其成也書成未
刊藁藏於家至其孫縣前始爲校刊有乾隆己丑
施養浩辛卯陸懼王辰胡德琳三序後有乾隆甲
子梁文法己丑其子福二跋

澤化祕閣法帖考正十卷附二卷釋文二卷

冰壺閣刊

本

國朝王澐撰 四庫全書著錄總作十二卷無釋
文二卷蕝林以宋淳化閣帖真偽雜出錯亂失序
歷經米元章黃長睿顧汝和諸家區別校勘尙未
明備因博取羣書詳悉考核事辭參錯必補正之
卽字畫淆譌亦援前人之說備爲詳訂仍依原目
編爲十卷從此是非同異皆有據依末附二卷一
爲古今法帖考論述閣帖及彙帖各本源流本末
一爲論書牘語則自述其所得筆法也末又附釋
文二卷爲烏程沈芥舟宗壽手書校定蓋芥舟旣
於諸帖所臨之下分綴考正并爲附二卷書版又

以己所校定釋文終焉前載宋史王著米芾黃伯思三傳及米氏原跋原題黃氏刊誤原序并王晉

玉刊誤原跋蕩林芥舟二敘

竹雲題跋四卷

茗上錢氏畫雲閣刊本

虛舟題跋十卷

虛舟題跋原三卷

閩川楊氏易鶴軒刊本

國朝王澐撰

澐仕履見四書類

前一編

四庫全書著錄

中後二編俱刊在後江蘇巡撫不及采進也其中編之目注云見竹雲本者不錄虛舟本復有跋者仍錄而每卷之下俱注曰原卷第幾自第四至十三止至後一編卽前三卷故標目增一原字云三編皆就其所臨摹碑帖作爲題跋以成書者虛舟

以工書名凡篆隸眞草各造其極故其評隲古刻
皆能鈎元挾奧窺見古人精神之所寄而其辨證
史家之闕謬其用心又同於歐陽趙洪之遺意而
爲之至其詆斥鄭汝器鑑蔣湘帆衡輩此文人相
輕自古而然不可獨咎虛舟也後之講書法者必
有取於斯講金石者亦未必不有取於斯焉前編
有沈歸愚序陳無軒焯錢壽泉人龍二跋中編有
錢香樹馮孟亭二序無軒暨楊竹坡建二跋後編
有朱清谷辰告序竹坡跋

石鼓文鈔二卷

韞光樓刊本

國朝許容撰

容字實夫號默公

實夫以辭尙功鄭樵潘

迪諸家石鼓文音釋微有牴牾乃入太學門內手
摹其文而參較注釋輯成是編引據既精舛駁斯
正其用心良已勤矣然祇就文論文而未及所取
各家所主成王宣王先秦後周之說以附益之則
尙不及金石萃編首卷全備也前有康熙戊辰金
葵齋 德嘉周廣菴金然 孫樹峯 岳頌 及其兄山濤
爾隆 四序後有自跋及胡翹羽 兆鳳 胡谷園 介社

二跋

觀妙齋金石文考略十六卷

雍正己酉刊本

國朝李光映撰

光映字子中嘉興人

四庫全書著錄按朱

竹垞喜藏金石文字所著吉金貞石志雖屬稿未

就而所爲題跋見於曝書亭集尙有六卷後所藏拓本盡爲子中所得因益以續之所得者以成是編自夏迄元計六百八種每種先詳載所書何體及撰人名氏并碑之所在而後采金石之書暨史傳地志文集說部之書以發明之并各注其出處間或綴以自識不過百分之一耳然子中避難趨易專事品論書法而不及考證事實故於蘭亭序載有十四種黃庭經載有二種玉版十三行載有三種聖教序載有五種千字文載有四種以及趙松雪天冠山詩白雪齋帖雪賦道德經法論過秦論文賦諸帖備載無遺可以想見其趨向矣前有

雍正己酉金心齋

介復序

金石存十五卷

舊寫本

國朝吳玉搢撰

玉搢字山夫號鈍根老人山陽人

山夫酷嗜金石

文字孳孳收集雖力有不逮然目之所遇亦無遺棄積之既久輯成是編前五卷爲篆書自商迄元凡五十二種後十卷爲隸書自漢迄唐凡六十八種皆列其文於前而解題於後詳其出處繫以時代辨經史之疑訂傳記之失攷古文篆隸行楷譌俗遞變之由亦已略具雖較之歐陽洪趙所儲不過十一而引據博瞻足資攷證固無媿於前賢也以其皆拓本之現存者故名之曰金石存前有乾隆

戊午自序又有目錄後自識李雨村所刊函海亦
收入載之題鈍根老人編云得於京都琉璃廠書
肆并引王述菴師語云此書乃吾鄉博學宏詞趙
播所著鈍根老人其別號也余取以核對是本無
不相同惟卷一齊公刀銘後跋函海本無雍正癸
卯以下十一行卷二吳延陵季子碑後跋函海本
改吾家爲延陵耳而目錄後自識稱己未三月鈍
根又書是鈍根老人正山夫別號也不知吾師何所
據而云然此書仍當屬之山夫爲確近其鄉李芝
齡宗昉亦得一鈔本校刊於浙江學署余未之見
也

鄭記三十四

石經考異二卷

荳浦八種本

國朝杭世駿撰 四庫全書著錄荳浦以顧亭林石經考述而不詳詳而不辨特引而疏通之又自唐開成以後其事少異特取而補綴之以成是編文雖創而義實因也其書大都補亭林之遺而加詳中參之以辨論如核五經六經之實定一字三字之歸析二十五碑四十八碑之數列堂東堂西之殊分自洛入鄴自汴入燕之地駁鴻都門學非太學魏石經非邯鄲漳書直能發千古之蒙滯可謂縱橫貫穿毫髮無遺也歷代石經自有亭林及荳浦兩家而後世有作偽如豐坊其人者且明白

而知所懼也夫前有厲樊榭鶚全謝山祖望符元

嘉三序後有歙縣許燭跋

粵東金石略十二卷 石洲草堂刊本

國朝翁方綱撰方綱字正三號覃溪大興人乾隆

廬寺卿嘉慶辛未重宴是編爲覃溪督學廣東所

作自序稱八年五周厯崖門蘇剔所得以其有與

圖經可互證者故於受代之頃鋟諸板而補訂討

論以俟異日若周憬功勳銘收於洪氏輒取鄭志

文言略例三記目錄之義書之其文雖具而弗書

則世所共見也今觀是書卷首恭錄 聖祖仁

皇帝 高宗純皇帝兩朝宸翰共二十八條自

卷一至卷九皆著錄廣東一省自唐以迄 昭代
金石刻凡五百六十二種或存其目或錄其文并
各爲考釋或昔有而今亡者如周憬功勳銘之類
亦必因類及之俱極詳審精密博而有要蓋粵東
金石本少故易以奏功也末附九曜石考上卷爲
石刻下卷爲攷證及詩并附以自所作詩二十首
體例與前迴異故別出之云

兩漢金石記二十二卷

原刻本

國朝翁方綱撰覃溪以漢刻存者甚希因編錄是
記或以地或以事類惟以目所親見爲据不復能
依年次故首及年月表一卷次及目錄一卷

附考
二首

石經一卷器物文二卷碑文十三卷隸續補及洪氏急就章注一卷隸八分考一卷補遺一卷而終之以班馬字類附記一卷凡錄者二百八十有六其有年月可表者一百十有四魏吳晉共十有附焉每碑皆列其全文標其行數具其款式而分條攷證於後寧詳無略極爲賅備雖洪氏隸釋隸續無以加之故王述菴師撰金石萃編幾於全部收入殊堪與是編並垂不朽矣是書成於乾隆丙午自爲之敘越四年己酉餞於南昌學署

潛研堂金石文跋尾六卷續七卷再續六卷三續六卷
原刻本

國朝錢大昕撰

大昕仕履見編年類

竹汀博采自三代迄元

金石文字以攷正經史之學多歐趙前賢所未逮

家藏拓本二千餘種著有跋尾八百餘篇每積二

百餘篇輒爲門弟子轉寫付梓故先後共成四集

其再續三續兩刻因無再字三字各於卷首行以

下以利字貞字別之跋中俱以辨別小學考證史

事爲主而評論詞章之美惡品題書法之工拙亦

間及焉王西泚

鳴盛

序稱其二十二史攷異固已

得未曾有出其餘技以治金石而考史之精博遂

能超軼前賢云然竹汀考證金石十駕齋養新錄

尙有一卷計三十五通潛研堂文集所載尙有二

十篇試鈔取以刊附諸後而錢氏一家之學全矣

潛研堂金石文字目錄八卷

原刻本

國朝錢大昕竹汀所藏金石拓本除有跋尾八百餘種之外尙多一千餘種因仿歐陽氏集古錄之例統有跋無跋以時代年月次序合編爲目錄八卷因時有增補及身未刻至沒後其壻瞿鏡濤中溶許仲叔蔭堂始取以附刊以見竹汀搜羅之富與述載之勤云

范氏天一閣碑目一卷續增一卷

寫本

國朝錢大昕編前明鄞縣范堯卿欽天一閣藏書久已名重海內其藏弄碑刻尤富而未有目錄傳

鄭記三十四

諸後世豈非缺事竹汀於乾隆丁未至鄞登閣啟
廚手披目覽因去其重複自三代迄宋元得七百
二十餘通以時代先後爲次并記撰書人姓名編
爲是帙俾後來有所考明碑亦有字畫可喜者以
近不著錄間有遺而未錄者其六世孫葦舟懋敏
復爲續增一百餘通附於後從此范氏藏弄不獨
以經籍著名矣倘其後人就是編所載志其崖略
如簡明目錄之式則此一帙不過如得魚之筌蹏
耳前有竹汀序并碑目記末有張文魚燕昌書後
文魚與葦舟皆與參訂之列者也

金石萃編一百六十卷

原刊本

國朝王昶撰

昶字德甫號蓴泉一號述菴青浦人乾隆甲戌進士官至刑部左侍郎

吾師博通經史尤嗜金石是編蒐羅金石文字自三代迄遼金計一千五百餘通盡取而甄錄之各以時代年月爲次其無年月者卽附每代之末缺其漫漶彫剝不可辨識者其文間見於他書則爲旁注以記其全惟經傳之文釋道之書以及千字文之類則置不錄六朝以前篆隸之書皆摹其點畫加以訓釋自唐以後隸體無足異者仍以楷書寫定凡碑制之長短廣狹額之題字陰之題名兩側之題識胥詳載不遺至題跋見於金石諸書及文集所載刪其繁複悉著於編前賢所未及始援

據故籍益以已見各爲按語一一詳說而證明之
所有唐石刻十二經文跋三卷大中郎官石柱題
名考一卷元祐黨籍碑姓名一卷元祐黨籍碑本
末總論一卷七十二弟子姓氏爵里異同考一卷
卽類附入合爲一百六十卷前有自序後有錢同
人侗跋蓋自經史小學暨於山經地志叢書別集
亦無弗參稽會萃覈其異同而審其詳略實爲嚮
來金石家所未有後之人欲考論金石取足於此
不煩他索矣但近儒著錄金石總迄元代而止蓋
以元史倉卒而成最爲草略全藉碑碣文字正其
是非是編未及元代美猶有憾聞述師曾以所有

元碑盡畀孫淵如師屬爲補續未成而歿其碑又不知落誰手也

雍州金石記十卷記餘一卷

原刊本

國朝朱楓撰

楓字近漪號排山仁和人

排山於乾隆辛未入秦

遲留十載其地爲周漢隋唐故都金石遺文所在皆有每逢古碑輒椎拓之積之又久得漢唐碑二百種其五代及宋元概置弗錄中有古人所未見者十猶二三焉其碑存而未獲者亦無幾矣因仿顧亭林金石文字記例或錄其全文或挈其崖略詳爲紀錄彙而成帙總以一方之所得不越雍州境外後畢秋帆撰核關中金石記大都濫觴於是

書也書成於乾隆己卯自爲之序

秦漢瓦圖記

原刊本

國朝朱楓撰排山在其子濂威寧任時所居地與秦之阿房漢之未央諸宮不三四十里於是徧訪故宮遺址所得秦漢瓦當甚夥乃擇其尤者得十五種又文同而書法小異者亦十五種各爲圖記之凡秦瓦三漢瓦二十九證據明確不同傳會之談以視林吉人甘泉宮瓦記止爲一種而設者殊覺渺乎其小矣前有乾隆己卯自序及詩後亦有詩二章

粵西金石略十五卷

嘉慶辛酉銅鼓亭刊本

國朝謝啟昆撰

啟昆仕履見別史類

蘇潭巡撫廣西時以通

志成於雍正中已七十載乃開局重輯命工徧掘古刻且檄郡縣訪求金石文其後椎拓日多郡縣之以脫本來者亦日眾於是摹寫於紙分件繫年自晉至元得四百八十餘種仿隸釋之例全錄其文復作銅鼓考及金石之待訪者存其目於末因文考事卽事證文有裨於史者十常二三皆其所是正而載定者也通志之修始於嘉慶庚申正月至明年四月而竣凡二百八十卷金石略得十五卷以其文自爲一書故另刻之以配其師翁覃溪之粵東金石略焉然粵東略并下及前明冠之昭

代僅得五百六十二種而是略迄元而止其數亦
幾相埒其好古之專著錄之富又視覃溪爲勝所
缺者尙有畿輔兩江閩川楚滇黔九處耳桐城胡
雒君虔旣與編校之役並爲之序

關中金石記八卷

經訓堂叢書本

國朝畢沅撰

沅字纓衛一字秋帆號靈巖山人鎮洋人乾隆二十五年狀元官至兩湖

總督卒贈太子太保

是編乃其任陝西巡撫時所作關中爲

三代秦漢隋唐都會之地碑碣之富甲於海內秋
帆曾屢任巡撫兩署總督故哀集陝甘各屬前後
所得金石刻始於秦訖於元計金十三瓦三石七
百八十一其七百九十九鉤稽經史抉摘異同條

舉而件繫之以成是編後有錢竹汀序之稱其正
六書偏旁以糾冰英之謬按禹貢古義而求漢籀
之源表河伯之故祠納道經之善本以及三藏五
經之祕七音九弄之根偶舉一隅都超凡諦云前
又有盧抱經序後有錢十蘭洪稚存暨孫淵如師
三跋

中州金石記八卷

經訓堂叢書本

國朝畢沅撰是編乃其任河南巡撫時所作記中
考正史傳辨析點畫與關中金石記相同但關中
記僅載定碑年月撰書人名氏及碑之所在者居
多此則幾於無碑不有考釋故自漢迄元金止六

件碑止三百二十九件而卷帙相亞有以也末有
洪稚存亮吉後序謂其荆豫之貞珉搜采靡遺殆

稱觀止云

十六長樂堂古器款識考四卷

原刊本

國朝錢坫撰

坫仕履見小學類

十蘭精於攷古所得古器

有以證文字之源流辨經史之譌舛者因仿博古
集古及辭氏法帖諸編摹其形製文字爲之攷釋
裒爲是編鼎彝簋爵尊匜隨手記之不復次第至
於泉刀小品有可發明史書者載入否者不載北
魏至唐時者並附焉凡商器七周器二十二秦器
一漢器十一北魏器一隨器一唐器二共四十九

器其云幾寸幾分者並用漢建初慮虎銅尺仿自
曲阜孔氏前有嘉慶丙辰元年自敘

浣花拜石軒鏡銘集錄二卷

原刊本

國朝錢坫撰十蘭以所藏古鏡二十五種摹其花
紋銘識各爲之釋凡漢鏡十五六朝鏡一唐鏡九
內有五種但有花紋而無銘識則以製造標奇存
之揆其體例與古器款識相同儘可統爲一書而
必分爲二者取其以類聚也

金石一跋四卷二跋四卷三跋二卷

原刊本

國朝武億撰

億號虛谷偃師人乾隆庚子進士官博山縣知縣

虛谷好金

石文字究極尋披其於往事多有證明因擇其尤

劄記成文上溯有周漢魏以迄梁隋凡八十六通
爲一跋又自唐之初代終於末季凡一百四通爲
二跋又沿於後唐逮宋金元凡三十通爲三跋其
爲前人已著錄無所推闡及推闡而有謬誤不能
不爲之訂其疏者始見於篇若自爲披獲則雖其
事之限於窮討不及亦無所棄遺資後人之研攷
焉所跋尙不及錢竹汀四跋之多而攷證精審實
堪亞於錢氏故王述菴師撰金石萃編采入者尤
夥焉惟吾師所引稱爲授堂金石跋與此本頗有
詳略皆當以此本爲正授堂金石跋其初藁也是本
前有乾隆庚戌自序後附答黃小松書遊鞏縣石

窟寺記書白鶴觀碑後三篇

唐揚武梁祠像一卷

小蓬萊閣刊本

國朝黃易摹刻

易號小松錢塘人官樂昌府同知

唐揚漢武梁祠

像十四幀舊藏武進唐氏後爲揚州汪氏所得以

贈小松因精摹付梓俾海內好古之士咸欣賞焉

後有朱竹垞

彝尊

查查浦

嗣孫

龔衡圃

翔麟

翁蘿

軒嵩年

查初白

慎行

金壽門

農

馬南齋

日璐

翁覃

溪

方綱

及小松諸跋其石刻攷釋詳見金石萃編

山左金石志中試采取以附刊於後更覺實有其

文矣

重定金石契

無卷數原刊本

國朝張燕昌撰

燕昌字芭堂號文魚又號金粟山人海鹽人乾隆丁酉科優貢生嘉

慶丙辰薦舉孝廉方正

是編與各家金石諸書稍異專搜尋

小品拓本繪其形製文字以五音分冊所存器物約略類舉其中有僅載跋尾或兼采攷證間及題詠不拘一律於款識大小悉依形肖質如彭城郡王鐵券以形製寬大則用縮本凡金五十三品石二十二品無款識者附錄於後以備參攷其曰重定者蓋先有初本行世而此爲最後重定之本攷證益加詳明卽陳抱之經金石圖所取法也然所載晉泰元甄以抱之書核之乃鑲書而非硯文魚屬之硯類中殊誤又如梁大監甄寶晉太康甄文

字顯然文魚誤作梁天監甄較以鎮書爲硯又加甚焉至漢喻麋陶陵鼎錄及同時人歌行至十一首之多漫無決擇又未免坐長繁蕪耳卷首恭錄

高宗純皇帝聖製錢鏐鐵券歌暨成親王趙

忠毅鐵如意調又有杭莖浦駿朱笠亭王偉人三

序錢竹汀魏泰松三題辭及凡例目錄後有查禾

堂夢齡楊竹坡建二跋

石鼓文集釋一卷心學十種本

國朝任兆麟撰兆麟字文田號心齋震澤人明趙凡夫宦光據

楊升菴石鼓僞本作章句一卷心齋以其所釋祇就字解而不克貫通大義殊多窒礙因摹字體之

可攷者原存古人於前集諸說之可采者釋今文
於後參已見一二以成是帙其不知升菴本爲僞
作根本已失其他可無論矣前有乾隆戊申自序
後有其門人馬天民從子璋二跋並載凡夫原跋
於末云

積古齋鐘鼎彝器款識十卷

文選樓叢書本

國朝阮元撰

元仕履見禮類

雲臺師聚同時諸家所有藏

器搨本與所自藏自搨者摹是編以續薛氏鐘鼎

款識之後薛氏所輯其四百九十三器師所集其

五百六十三器薛氏始於夏迄漢而止此則託始

於商下及魏晉凡商器二卷周器六卷秦及漢器

二卷而以魏器四晉器五附於後祇釋文字不及形製亦遵薛氏例也書中辨識疑文稽考古籍國邑大夫之名有可補經傳所未備偏旁篆籀之字有可補說文所未及以較薛氏書固宜並駕齊驅也前有自序及商周銅器說二篇商周兵器一篇後有朱椒堂爲弼序

兩浙金石志十八卷

廣東刊本

國朝阮元撰初吾師督學兩浙凡三載兩任浙撫凡八載年華甚盛著述彌勤以其餘力及於浙中金石搜訪摹搨頗窮幽遠又有趙晉齋魏何夢華元錫許周生宗彥助其搜訪考證勒成是志迨督

粵時重加訂定併刪去鐘鼎錢印之不定屬浙物者計得秦漢至唐初一卷開元丁巳至唐末二卷五代一卷宋九卷元六卷總六百五十八種刊版通行好古者得有所稽當與曩所編輯輶軒錄防護錄同一嘉惠兩浙之作惜當撫浙時未及成通志西湖志爲闕典也前有道光甲申自序時新修廣東通志已刊竣五載矣

漢延熹西嶽華山碑考四卷

文選樓叢書本

國朝阮元撰漢西嶽華山碑明嘉靖乙卯地震碑毀今僅存長垣四明華陰三拓本而已吾師得四明本假取成邸詒晉齋長垣本北平朱氏華陰本

互對缺文輯成是考卷一博采著錄諸家之說皆就各書內錄出非從冊軸內錄出者卷二敘長垣標冊翦本卷三敘四明標軸未翦本卷四敘華陰標冊翦本以上三本各題款皆從本冊本軸內錄出者歷敘其流傳之緒又縮刻碑文以長垣本校多之字補四明華陰之缺而以墨線界之已損之字以墨圈識之以比金石萃編十一所列碑字較爲分明至於考覈精審則出周雪客天發神識碑考吳槎客國山碑考之右矣前有江子屏落序

御史臺精舍碑題名一卷郎官石柱題名一卷

讀畫齋叢書本

國朝趙魏編

魏字洛生號晉齋仁和人

此唐碑二乃其遊關中

時從西安府學中所摹石而錄出者一爲開元十一年立崔湜撰文梁昇卿隸書一爲大中十二年立不題書人名氏今觀二碑所列題名較趙子函顧亭林朱竹垞輩所見多十之三四蓋諸家所據以攷證者大抵皆工人拓本故往往遺漏不全斷不能如晉齋親至碑下手摹其文而一字不遺者也是編非特可補碑刻之闕卽自唐初至於宣宗之世上下二百餘年三院諸司姓名爵秩舉班班可攷其有裨於史傳豈小補哉惜其於精舍臺碑記文竟遺之不錄其碑究未全也畢秋帆關中金石記所載稍具其略乾隆丙午吳槎客

纂序

金塗銅塔攷一卷

杭州表忠觀刊本

國朝錢泳撰

泳字立羣號梅溪金匱人

吳越忠懿王崇信佛事

曾於周顯德二年範銅爲塔塗之以金高四寸三

分重三十六兩四版合成外俱繪梵筴故事計造

八萬四千座

見塔記

迄今八百餘年尙有流傳人間

者如常熟破山寺一蕭山祇園寺一嘉興白蓮寺

僅一版順治中杭州慶忌塔圯則有塔百數而山

陰陳氏所藏朱石君

珪

上供

天府且爲西清珍

祕梅溪爲忠懿王十八世孫因輯錄舊聞合詩歌

爲一卷并繪圖附其中與金石萃編金石契暨兩

浙金石志所載俱詳略互見者也前有乾隆乙卯

謝蘇潭

賦昆

敘嘉慶丙辰翁覃溪

方綱題

金石文鈔八卷

古墨齋刊本

國朝趙紹祖撰

紹祖字琴士涇縣人

琴士仿都穆金薤琳琅

體例甄錄唐以前碑刻文字而各爲之跋間附以

詩凡都氏所刻六十三碑不復贅僅附其目於後

古碑如名人所撰刊入本集者名聲顯赫眾所共

知者法帖所刻翻摹不一者釋典道藏各有板本

者鑿佛造像語言鄙俚者殘闕太多不復可讀者

僧道墓碣無關要義者顯然僞造以欺後世者皆

不刻入其持擇頗矜貴攷證亦極精審直堪與都

氏書後先並駕矣前有嘉慶壬戌法時帆

式善序

并自序凡例凡例稱月有金石目錄一書將續刻以質同志今尙未見

金石學錄四卷

芝省齋刊本

國朝李遇孫撰

遇孫履歷見傳記類

金澗性耽金石手所搜

羅甚夥嘗考前人之編簡訂異辨同自經典史漢以迄本朝諸家凡爲金石之學者得四百餘人皆錄其姓氏而各詳其所著之書凡專錄一地僅釋一碑或文集散見札記偶及無不綴輯卽著述未傳者而其人素稱好古爲諸家所引重者亦錄其姓氏兼有藏弃諸物銘心絕品間以所知者附錄一二俾學者由其人以求書由其書以攷古器

古碑而藉是以證明經史之同異謬譌其用心可謂
深且厚矣前有自撰凡例及其從兄湘芷富孫序

湖南金石志二十卷 湖南省刊本

國朝瞿中溶撰

中溶字木夫號鏡濤嘉定人官湖南布政司理問

鏡濤官

湖南時會有續修通志之舉俾入局收掌并專輯
金石一門爰取昔年所輯有屬湖南境內者增以
新得覆加釐正編入志中大指有墨本者錄全文
餘則采之宋以來專家之書復因通志例須廣蒐
故散見他書及郡縣志之確然無疑者兼著之所
載迄元而止其不知時代者附於末卷而自明洪
武戊申以迄于今四百五十餘載之石刻槩不之

及蓋遵近儒金石書成例而不循前人通志舊例也其甄錄賅備攷證精密爲從來輿地志所未有蓋鏡濤爲錢竹汀之壻學有淵源故能臻此美備也以通志卷帙繁重未能家有其書乃專摘取此門別刷以行故版心仍稱湖南通志前有嘉慶庚辰自序

石經補攷十二卷

原刊本

國朝馮登府撰

登府字雲伯號柳東嘉興人嘉慶庚辰進士由庶吉士改官寧波府

教授按漢魏唐蜀兩宋俱有石經而專著一書以編

攷之者則惟顧亭林萬季野杭堇浦三家然皆祇備攷石經原委而於古今文異同之辨俱略備而

不詳猶爲闕事柳東因就三家之書益以洪景伯黃伯思而下各家著錄及他書之攷及石經文字者詳加采摭附以己見以成是編凡漢石經攷異二卷魏石經攷異一卷拾遺一卷唐石經攷異二卷誤字辨一卷蜀石經攷異二卷北宋石經攷異一卷南宋石經攷異一卷遺字一卷專析其古今通借之原以補前人之未備旣精且博有條不紊遂爲世之言石經者不可少之書矣惜其所攷證間有差譌卽如稱漢石經魯卽蔡邕所書邕習魯詩獨斷有頌序三十一篇皆魯詩故書丹用之云云按獨斷所引正屬毛詩序故惠松崖九經古義

引以爲漢末毛詩已行之證而是書反引爲邕習
魯詩之證若此之類往往而有要於書之大體無
嫌耳每種前各有自序又有道光壬午阮雲臺師
序據吾師序知柳東尙有三家詩異文論語異文
等書余俱未見

求古精舍金石圖四卷

說劍樓刊本

國朝陳經撰

經字新畬一字抱之以商周之吉金

抱之鳥程人

日益鮮少後之人欲知古昔制度之詳藉非圖奚
由得之因取所藏尊彝鐘鼎戈劍刀布鏡印剛卯
以及瓦當磚甃之屬倩工樵寫而以晉尺度之以
官平權之詳說於圖後加以考證俱極精確其體

例全本張文魚金石契而兼參之考古博古諸書者也中有所附新定周尺自謂從周制銅劍審定仁和趙寬夫垣頗不以爲然詳見其答余書中又

博文一卷間有并其博面而圖之此都可已而不

已殊不及其全書之工覈矣然年甫踰冠有此著

作亦近人所罕觀也前有阮雲臺師暨潘芝軒世

恩吳玉松雲黃蕘圃丕烈倪雲裝倬施北研國祚

六序并許周生宗彥施少峯嵩吳梅庵聖鳳三題

詞末有林石筍從炯倪米樓稻孫二跋并其兄金

坡鑾後序前後又有自序及跋

鄭堂讀書記卷三十四